

DASAR PEMBANGUNAN MAHKAMAH

BAHAGIAN HAL EHWAL UNDANG-UNDANG

I. KENYATAAN DASAR

Keluruhan Perlembagaan dan kedaulatan undang-undang menjadi asas kepada amalan sistem demokrasi berparlimen dan sistem Kerajaan berasaskan pembahagian kuasa diantara badan-badan Eksekutif, Perundangan dan Kehakiman. Bagi mendukung badan kehakiman, Bahagian Hal Ehwal Undang-Undang, Jabatan Perdana Menteri (BHEUU-JPM) yang terdiri dari Bahagian Hal Ehwal Undang-Undang (BHEUU), Biro Bantuan Guaman (BBG) dan Jabatan Insolvensi Malaysia (JIM) telahpun mensasarkan misi dan objektif untuk menyelia pentadbiran Jabatan-Jabatan di bawahnya, merancang dan membangunkan infrastruktur Mahkamah serta mencetuskan inisiatif baru ke arah penambahbaikan dalam sistem pentadbiran keadilan negara berdasarkan kehendak Kerajaan dan keperluan masyarakat, Di antara peranan dan fungsi utama BHEUU adalah sebagai Agensi Pelaksana Sektor Awam yang bertanggungjawab dalam memberikan perkhidmatan yang berkualiti kepada pelanggan dengan berorientasikan nilai kemanusiaan sejagat serta mengamalkan budaya kerja cemerlang yang berterusan. BHEUU dirangka untuk memandu dan mentadbir Jabatan-Jabatan di bawahnya dengan cekap, teratur, selari dengan dasar Kerajaan dan memenuhi kehendak rakyat melalui proses penambahbaikan ke atas peruntukan undang-undang dan pelaksanaannya.

II. DASAR DAN STRATEGI PENCAPAIAN

Selaras dengan penentuan dasar untuk menyediakan prasarana bertaraf kelas pertama kepada Mahkamah, BBG Dan JIM tersebut BHEUU telah merangka berbagai strategi pencapaian seperti berikut :-

1.1 Menyediakan Infrastruktur Fizikal Yang Mencukupi Bagi membolehkan Urusan Pentadbiran Kehakiman Berjalan Lancar.

Organisasi Institusi Kehakiman moden telah wujud sejak zaman penjajahan British lagi. Skop, bidangkuasa dan beban kerja Badan Kehakiman telah berkembang dan diperluaskan sejak kemerdekaan, khususnya dengan bertambahnya bilangan penduduk serta aktiviti ekonomi dan komersial dalam tempoh 47 tahun kebelakangan ini. Walau bagaimanapun kemudahan-kemudahan fizikal serta teknologi Mahkamah tidak disediakan selari dengan perkembangan dalam aktiviti kehakiman. Bangunan-bangunan yang dibina sebelum Perang Dunia Kedua (*Pre-War Buildings*) masih digunakan sebagai Mahkamah dan ruang sediada di bangunan-bangunan tersebut telah tidak lagi memadai untuk keperluan semasa Badan Kehakiman. Kedudukan ini telah menjejaskan pentadbiran kehakiman dan telah menyumbang kepada kes-kes yang tertunggak di Mahkamah seluruh negara. Jika keadaan ini berterusan, ianya boleh memudaratkan hak asasi rakyat serta kepentingan ekonomi negara. Bagi mengatasi masalah di atas dan untuk memenuhi keperluan semasa Badan Kehakiman, BHEUU telahpun mengambil tindakan strategik seperti berikut: a) Membina bangunan-bangunan Mahkamah baru bagi menggantikan bangunan Mahkamah yang ditempatkan diruang yang disewa. b) Membina Bangunan-bangunan Mahkamah yang mempunyai satu atau dua buah bilik bicara di daerah-daerah pentadbiran yang tidak mempunyai

Bangunan Mahkamah. Ini adalah bertujuan untuk memudahkan orang ramai berurusan dengan pihak Mahkamah. c) Membantu medisentralisasikan Mahkamah-Mahkamah yang besar ke beberapa buah tempat yang berhampiran. Ini adalah bertujuan untuk mengurangkan masalah kesesakan di sebuah tempat dan disamping itu akan memudahkan lagi orang ramai berurusan dengan Mahkamah.

1.2 Mempertingkatkan Kemudahan-Kemudahan Sedia Ada Di Mahkamah.

Bagi mengekalkan keselesaan anggota Mahkamah dan juga orang ramai yang berurusan dengannya, bangunan-bangunan Mahkamah perlu diselenggara dengan sempurna secara berterusan. Bagi maksud tersebut peruntukan kewangan senantiasanya diperlukan bagi menyediakan kemudahan-kemudahan awam serta memperbaiki bangunan-bangunan Mahkamah yang sedia ada di sebanyak 113 lokasi di seluruh negara. Di samping penyelenggaraan biasa, BHEUU telah juga merancang untuk membesarkan ruang kerja Mahkamah selaras dengan keperluan semasa. Kebanyakan bangunan-bangunan Mahkamah yang sedia ada tidak dapat menampung keperluan semasa. Untuk itu ruang-ruang tambahan dicadangkan untuk dibina bagi mengadakan bilik-bilik seperti perpustakaan, kantin, setor, bilik fail, bilik sembahyang dan pembesaran ruang kaunter orang awam. Memandangkan Mahkamah merupakan sasaran bagi perbuatan khianat maka aspek-aspek keselamatan fizikal Mahkamah akan dipertingkatkan lagi. Telah menjadi dasar BHEUU untuk mengadakan pagar keselamatan untuk semua Mahkamah. Di samping itu Mahkamah juga akan dilengkapi dengan sistem pencegahan kebakaran. Memandangkan seringkali kebakaran bangunan dikaitkan dengan masalah pendawaian letrik, maka BHEUU dengan kerjasama pihak JKR sedang mengambil tindakan untuk memeriksa dan dimana perlu membuat pendawaian yang baru di bangunan-bangunan Mahkamah seluruh negara.

1.3 Memastikan Keselesaan Penginapan Dan Keselamatan Hakim.

Bagi mengekalkan keselesaan Hakim Mahkamah Tinggi khususnya berkaitan dengan penginapan, BHEUU telah merancang pembinaan rumah-rumah kediaman rasmi Hakim di beberapa lokasi terpilih. Kebanyakan Hakim-Hakim Mahkamah Tinggi telah tidak dibekalkan rumah rasmi kerajaan (institutional quarters) dan terpaksa menyewa rumah atau menduduki kuarters Kerajaan Negeri. Keadaan ini agak menyusahkan kerana kesukaran mendapatkan rumah Kerajaan Negeri dan rumah sewa yang sesuai dengan taraf Hakim pada kadar yang munasabah. Selain daripada itu, kesukaran mendapatkan rumah sewa yang sesuai dari segi lokasi dan dari aspek keselamatan. Kebanyakan rumah sewa tidak dibekalkan dengan kelengkapan dan kemudahan yang setanding dengan taraf/kedudukan Hakim. Memandangkan kebanyakan rumah sewa terletak di kawasan perumahan, keselamatan Hakim juga turut terjejas kerana terdedah kepada orang awam. Adalah menjadi harapan BHEUU bahawa dengan wujudnya rumah kediaman yang rasmi, rumah-rumah tersebut dapat diselenggara dan dikawal mengikut keperluan.

1.4 Menyediakan Kemudahan Penyimpanan Fail/Dokumen Secara Berpusat

Mengikut peraturan semasa dan keputusan Jemaah Menteri, fail-fail Mahkamah sedia ada tidak boleh dilupuskan walaupun telah berusia lebih daripada 40 tahun. Tambahan pula fail dan dokumen tersebut sentiasa perlu dirujuk semula dan memerlukan penyimpanan yang sistematik dan teratur. Bilangan fail yang semakin bertambah setiap hari menyebabkan ruang bagi menempatkan fail semakin sempit dan padat. Sebahagian besar ruang-ruang di premis Mahkamah telah digunakan secara optima. Fail-fail tersebut adalah dokumen yang dilindungi dan ianya perlu dipelihara supaya tidak mampat dan tidak dipadatkan sepenuhnya ke dalam premis mahkamah. Bagi tujuan ini BHEUU telah merancang pembinaan bangunan khas bagi keperluan penyimpanan secara berpusat mengikut zon di mahkamah seluruh negara dengan mengambilkira ruang yang luas, keselamatan dan pengudaraan. Selain daripada itu, perancangan ini juga dipanjangkan untuk pembinaan pusat rekod Jabatan Insolvency Malaysia yang juga menghadapi masalah penyimpanan fail.

1.5 Bangunan Gunasama Biro Bantuan Guaman dan Jabatan Insovensi Malaysia.

Buat masa ini ruang pejabat Jabatan Insolvency Malaysia (JIM) dan Biro Bantuan Guaman (BBG) ditempatkan di premis swasta yang disewa. Bidang tugas JIM dan BBG masing-masing merangkumi aspek pentadbiran kebangkrapan dan khidmat bantuan guaman. BHEUU telahpun merancang untuk membina bangunan baru bagi menempatkan secara gunasama ruang pejabat cawangan JIM dan BBG di beberapa lokasi di ibu negeri terpilih. Bangunan baru tersebut akan mengandungi ruang kerja serta bilik-bilik sokongan seperti perpustakaan, bilik fail, kafetaria, surau dan lain-lain.